

Na osnovu člana 13. stav 2. alineja 12. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06), člana 29. stav 1. tačka 2. Zakona o lokalnoj samoupravi ("Službene novine Kantona Sarajevo", broj 22/00) i člana 12. stav 2. Statuta Općine Ilijaš ("Službene novine Kantona Sarajevo", broj 20/09), Općinsko vijeće Ilijaš na sjednici održanoj dana _____, donijelo je

**ODLUKU
o priznanjima Općine Ilijaš**

I – OPĆE ODREDBE

Član 1.

Ovom odlukom određuje se način dodjele, vrsta, izgled, broj, učesnici i nosilac aktivnosti u postupku dodjele javnih priznanja i odlikovanja Općine Ilijaš.

Član 2.

Javna priznanja i odlikovanja općine Ilijaš su:

1. Povelja o proglašenju počasnim građaninom
2. Plaketa
3. Nagrada – priznanje
4. Pohvala

Član 3.

Javna priznanja iz člana 2. dodjeljuju se po pravilu za Dan Općine Ilijaš radi odavanja priznanja za postignuća i doprinos od posebnog značaja za razvoj i ugled Općine, a naročito za uspjehe u unapređivanju privrede, nauke, kulture, zaštite i unapređivanje okoline, sporta, tehničke kulture, zdravstva i drugih javnih djelatnosti, te za promociju aktivnosti koje su tome usmjerene.

Javna priznanja iz člana 2. ove odluke, mogu se dodijeliti fizičkim osobama i kolektivima sa prebivalištem, odnosno sjedištem na području općine Ilijaš.

Izuzetno od odredbe iz prethodnog stava ovog člana, priznanja se mogu dodijeliti pojedincima i kolektivima koji nemaju prebivalište, odnosno sjedište na području općine Ilijaš.

Član 4.

U jednoj kalendarskoj godini istoj pravnoj i fizičkoj osobi može se dodijeliti samo jedno javno priznanje.

Počasnom građaninu ne dodjeljuju se druga javna priznanja Općine Ilijaš.

II – JAVNA PRIZNANJA I ODLIKOVANJA

1. Povelja o proglašenju počasnim građaninom

Član 5.

Počasnim građaninom Općine Ilijaš može se proglasiti građanin Bosne i Hercegovine ili druge države, koji je svojim radom, naučnim ili političkim djelovanjem značajno doprinio napretku i ugledu Općine Ilijaš, ostvarivanju i razvoju demokratije u Bosni i Hercegovini, mira u svijetu i napretku čovječanstva.

Proglašenje počasnim građaninom znak je počasti i ne daje nikakva posebna prava.

Počasnom građaninu dodjeljuje se posebna POVELJA O PROGLAŠENJU POČASNIM GRAĐANINOM OPĆINE ILIJAŠ.

Počast se može opozvati ako se počastvovani pokaže nedostojnim takve počasti.

Odluku o opozivu donosi Općinsko vijeće Ilijaš na prijedlog ovlaštenih predlagača iz člana 15. ove odluke.

Član 6.

Počasnim građaninom može se proglasiti građanin općine Ilijaš, koji je posebno zaslužan za napredak i promociju ugleda Općine Ilijaš u Bosni i Hercegovini i izvan državnih granica.

Počasnim građaninom Općine Ilijaš izuzetno se može proglasiti i osoba koja nema prebivalište na području općine Ilijaš, a zaslužan je za napredak Općine.

2. Plaketa Općine Ilijaš

Član 7.

Plaketa Općine Ilijaš je javno priznanje koje se može dodijeliti fizičkim i pravnim osobama za iznimna postignuća i doprinos unapređenju i razvoju Općine Ilijaš u protekloj kalendarskoj godini ili proteklim kalendarskim godinama.

3. Nagrada – Priznanje Općine Ilijaš

Član 8.

Nagrada – Priznanje Općine Ilijaš je javno priznanje koje se može dodijeliti fizičkim i pravnim osobama za svoj dugogodišnji rad na području Općine Ilijaš ili za realizaciju projekata značajnih za razvoj Općine Ilijaš.

4. Pohvala Općine Ilijaš

Član 9.

Pohvala Općine Ilijaš je javno priznanje koje se dodjeljuje fizičkim i pravnim osobama za donacije i slične aktivnosti, za uspješnu saradnju, te za doprinos razvoju i promociju ugleda Općine Ilijaš.

III – IZGLED JAVNIH PRIZNANJA OPĆINE ILIJAŠ

Član 10.

Povelja o proglašenju počasnim građaninom Općine Ilijašu lijevom gornjem uglu natpis: BOSNA I HERCEGOVINA, FEDERACIJA BOSNE I HERCEGOVINE, KANTON SARAJEVO, OPĆINA ILIJAŠ, s grbom OPĆINE ILIJAŠ.

Na sredini povelje je natpis: POVELJA O PROGLAŠENJU POČASNIM GRAĐANINOM OPĆINE ILIJAŠ, ime i prezime osobe kojoj se dodjeljuje, te datum donošenja odluke i potpis predsjedavajućeg Općinskog vijeća Ilijaš.

Član 11.

Plaketa Općine Ilijaš u lijevom gornjem uglu ima natpis: BOSNA I HERCEGOVINA, FEDERACIJA BOSNE I HERCEGOVINE, KANTON SARAJEVO, OPĆINA ILIJAŠ, s grbom OPĆINE ILIJAŠ.

Na sredini plakete je natpis: PLAKETA OPĆINE ILIJAŠ, oznaka (naziv) područja iz člana 7. ove odluke za koje se dodjeljuje, ime i prezime fizičke osobe, odnosno naziv pravne osobe kojoj se dodjeljuje, te datum donošenja odluke i potpis predsjedavajućeg Općinskog vijeća Ilijaš.

Član 12.

Nagrada – Priznanje Općine Ilijaš u lijevom gornjem uglu ima natpis: BOSNA I HERCEGOVINA, FEDERACIJA BOSNE I HERCEGOVINE, KANTON SARAJEVO, OPĆINA ILIJAŠ, s grbom OPĆINE ILIJAŠ.

Na sredini priznanja je natpis: PRIZNANJE OPĆINE ILIJAŠ, oznaka (naziv) područja iz člana 8. ove odluke za koje se dodjeljuje, ime i prezime fizičke osobe, odnosno naziv pravne osobe kojoj se dodjeljuje, te datum donošenja odluke i potpis predsjedavajućeg Općinskog vijeća Ilijaš.

Član 13.

Pohvala Općine Ilijaš u lijevom gornjem uglu ima natpis: BOSNA I HERCEGOVINA, FEDERACIJA BOSNE I HERCEGOVINE, KANTON SARAJEVO, OPĆINA ILIJAŠ, s grbom OPĆINE ILIJAŠ.

Na sredini pohvale je natpis: POHVALA OPĆINE ILIJAŠ, ime i prezime osobe kojoj se dodjeljuje s naznakom razloga dodjele navedenog u članu 9. ove odluke, te datum donošenja odluke i potpis općinskog načelnika.

IV – POSTUPAK PREDLAGANJA, DONOŠENJA ODLUKE I DODJELA JAVNIH PRIZNANJA

Član 14.

Radi predlaganja kandidata za javna priznanja iz člana 2. tačke 1., 2. i 3. Komisija za javna priznanja, obilježavanje historijskih događaja i ličnosti i zaštitu kulturnog i prirodnog naslijeđa Općinskog vijeća Ilijaš (u daljem tekstu: Komisija) upućuje poziv subjektima iz člana 15. ove odluke, najkasnije dva mjeseca prije dodjele priznanja.

Rok za podnošenje prijedloga ne može biti kraći od 15 dana od dana raspisivanja poziva preko lokalnih sredstava javnog informisanja i općinske web stranice. Poziv sadrži uvjete za dodjelu i rok za podnošenje prijedloga za dodjelu javnih priznanja.

Član 15.

Prijedlog za dodjelu javnih priznanja iz člana 2. tačke 1., 2. i 3. mogu dati:

- pravna lica sa sjedištem na području općine Ilijaš (privredna društva, političke stranke, mjesne zajednice, udruženja građana, ustanove i drugi organi i organizacije),
- građani sa prebivalištem na području općine Ilijaš.

Prijedlog se podnosi Komisiji u pisanom obliku.

Član 16.

Prijedlog iz člana 15. ove odluke sadrži:

- podatke o podnosiocu prijedloga,
- obrazloženje postignuća i doprinosa zbog kojih se daje prijedlog za kandidata za dodjelu javnog priznanja Općine Ilijaš uz odgovarajuću dokumentaciju,
- biografiju za fizičke osobe i podatke o poslovanju za pravnu osobu,
- vrstu javnog priznanja za koje se osoba predlaže.

Na zahtjev Komisije podnositelj prijedloga dužan je dostaviti i dodatne podatke i dokumentaciju. Komisija može, uz saglasnost podnosioca prijedloga, promijeniti vrstu javnog priznanja za koje se kandidat predlaže, te općinskom načelniku dati prijedlog za dodjelu Pohvale Općine Ilijaš. Komisija može, uz saglasnost podnosioca prijedloga, odrediti područje iz kojeg se kandidatu predlaže dodijeliti priznanje.

Član 17.

Komisija razmatra prijedloge za dodjelu javnih priznanja Općine Ilijaš dostavljene u roku, te izrađuje pisani izvještaj o svom radu i mišljenje s obrazloženjem o pojedinačnim prijedlozima u skladu sa kriterijima utvrđenim Pravilnikom o procedurama i kriterijima za dodjelu priznanja Općine Ilijaš i dostavlja ga Općinskom vijeću Ilijaš.

Član 18.

Općinsko vijeće Ilijaš, na temelju izvještaja Komisije iz prethodnog člana, donosi odluku o dodjeli javnog priznanja iz člana 2. tačke 1., 2. i 3. ove odluke.

Član 19.

Na temelju odluke o dodjeli javnih priznanja predsjedavajući Općinskog vijeća Ilijaš na svečanoj sjednici povodom Dana Općine uručuje javna priznanja Općine Ilijaš za prethodnu kalendarsku godinu.

Izuzetno od odredbe prethodnog stava, u izbornoj godini javna priznanja može uručiti općinski načelnik na svečanom prijemu povodom Dana Općine.

Član 20.

Odluku o dodjeli Pohvale Općine Ilijaš donosi općinski načelnik i uručuje Pohvalu.

Osim povodom Dana Općine, Pohvala se može dodijeliti u ostalim svečanim i protokolarnim prilikama.

V – PRIJELAZNE I ZAVRŠNE ODREDBE

Član 21.

Javna priznanja Općine Ilijaš koja se dodjeljuju grupi fizičkih osoba, ako je ostvarenje, odnosno doprinos koji se nagrađuje, rezultat njihovog zajedničkog rada, sastoji se od pojedinačnog priznanja za svaku fizičku osobu.

Član 22.

Općinska priznanja mogu se dodjeljivati i posthumno, u slučaju da smrt nastupi u godini za koju se dodjeljuje ili u toku dodjele priznanja.

Priznanje će se uručivati članovima njegove/njene porodice, odnosno zakonskim nasljednicima.

Član 23.

Danom stupanja na snagu ove odluke prestaje da važi Odluka o priznanjima općine Ilijaš ("Službene novine Kantona Sarajevo", broj 36/09)

Član 24.

Ova odluka stupa na snagu danom objavljivanja u "Službenim novinama Kantona Sarajevo".

Broj: _____

Ilijaš, _____

Predsjedavajući Općinskog vijeća Ilijaš

Damir Filipović, s.r.

OBRAZLOŽENJE

Pravni osnov za donošenje ove odluke sadržan je u članu 13. stav 2. alineja 12. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06), člana 29. stav 1. tačka 2. Zakona o lokalnoj samoupravi ("Službene novine Kantona Sarajevo", broj 22/00) i člana 12. stav 2. Statuta Općine Ilijaš ("Službene novine Kantona Sarajevo", broj 20/09) i zaključku Općinskog vijeća Ilijaš sa 14.sjednice održane dana 31.12.2013.godine. Komisija za javna priznanja, obilježavanje historijskih događaja i ličnosti i zaštitu kulturnog i prirodnog naslijeđa je pripremila Nacrt Odluke o priznanjima Općine Ilijaš i Nacrt Pravilnika o procedurama, kriterijima za dodjelu priznanja, te iste dostavlja Općinskom vijeću Ilijaš na razmatranje.